

CONVENIO DE COLABORACIÓN ENTRE A SECRETARÍA XERAL DA EMIGRACIÓN DA XUNTA DE GALICIA E A ACADEMIA GALEGA DO AUDIOVISUAL PARA O DESENVOLVEMENTO DUNHA PROGRAMACIÓN ESTABLE DE CINE GALEGO EN ENTIDADES GALEGAS DO EXTERIOR.

Santiago de Compostela, 14 de marzo de 2022

REUNIDAS


Dunha parte, a **Secretaría Xeral da Emigración**, representada neste acto polo secretario xeral da Emigración, D. Antonio Rodríguez Miranda, nomeado mediante Decreto 140/2020, do 17 de setembro, en virtude das facultades que lle confire a disposición adicional segunda do Decreto 109/2021, do 15 de xullo, de estrutura orgánica dos órganos superiores e de dirección dependentes da Presidencia da Xunta de Galicia.

E doutra, a **Academia Galega do Audiovisual**, representada neste acto polo presidente da entidade, D. Álvaro Pérez Becerra, actuando no seu nome e representación en virtude do establecido nos estatutos da entidade.

As partes comparecentes recoñécense mutuamente plena lexitimación, capacidade e representación, para a sinatura do presente convenio de colaboración e, para estes efectos,



EXPOÑEN



PRIMEIRO.- As administracións públicas no exercicio das súas competencias poden subscribir convenios de colaboración con outras administracións ou entes de dereito público e con persoas físicas ou xurídicas suxeitas ao dereito privado, ao abeiro do disposto no artigo 47 e seguintes da Lei 40/2015, do 1 de outubro, de réxime xurídico do sector público, en concordancia co artigo 6 da Lei 9/2017, do 8 de novembro, de contratos do sector público.

SEGUNDO.- De acordo co establecido no artigo 22 do Decreto 109/2021, do 15 de xullo, de estrutura orgánica dos órganos superiores e de dirección dependentes da Presidencia da Xunta de Galicia, a Secretaría Xeral da Emigración é o órgano superior da Administración xeral da Comunidade Autónoma de Galicia, no ámbito da

emigración e do retorno, ao que lle corresponden as competencias recollidas na Lei 7/2013, do 13 de xuño, da galegitude e, en particular, as relacións coas comunidades galegas no exterior, así como a organización de actividades no ámbito cultural que faciliten o coñecemento da lingua, da cultura e das tradicións de Galicia nos territorios nos que estas están asentadas.

TERCEIRO.- De acordo co citado Decreto 109/2021, do 15 de xullo, a Secretaría Xeral da Emigración xestiona diversos programas tendentes a potenciar e reforzar os vínculos coa nosa cultura dos galegos e galegas residentes fóra de Galicia, que executa a través da estrutura das entidades galegas do exterior. Estas entidades galegas son asociacións nas que tradicionalmente se reúnen as persoas emigrantes e as súas familias para manter vivos os costumes que nos son propios e reforzar os lazos sociais e culturais. Arredor destas asociacións reúnese un gran número de persoas galegas, que son os axentes principais a través dos que Galicia fomenta a súa cultura.

CUARTO.- A Academia Galega do Audiovisual é unha entidade sen ánimo de lucro, que ten entre os seus obxectivos fomentar o desenvolvemento das artes e das ciencias relacionadas directa ou indirectamente coa produción audiovisual en Galicia en todos os seus sectores, xéneros e formatos.

QUINTO.- A Academia Galega do Audiovisual está a desenvolver o Ciclo Mestre Mateo, unha programación estable de cinema composta en exclusividade polas películas finalistas nos Premios Mestre Mateo do audiovisual galego, galardóns que destacan as obras de maior calidade na produción audiovisual do ano e son organizados tamén pola Academia.

SEXTO.- Ambas as dúas partes coinciden en que é necesario xuntar esforzos e exercer unha colaboración que permita ofrecer á comunidade galega no exterior a oportunidade de coñecer e gozar do cine feito en Galicia a través do Ciclo Mestre Mateo.

Neste contexto, non existe outra entidade para desenvolver este proxecto e, polo tanto, non procede promover a concorrència pública, polo que, en cumprimento do disposto na Lei 1/2016, do 18 de xaneiro, de transparencia e bo goberno, estímase xustificada a imposibilidade de promover a concorrència de ofertas e de formalizar un contrato administrativo.

E, en virtude do exposto, ambas as dúas partes recoñécense capacidade para comprometerse, en virtude do presente convenio de colaboración, consonte as seguintes

CLÁUSULAS

PRIMEIRA.- Obxecto

Este convenio ten por obxecto establecer o marco de colaboración entre a Secretaría Xeral da Emigración e a Academia Galega do Audiovisual para desenvolver unha programación estable de cine galego en 8 entidades galegas no exterior a través do Ciclo Mestre Mateo, un proxecto audiovisual orixinal impulsado pola Academia Galega do Audiovisual.

SEGUNDA.- Compromisos da Academia Galega do Audiovisual

A Academia Galega do Audiovisual comprométese a:

- Elaborar a programación de 8 películas, que en todo caso serán finalistas nos Premios Mestre Mateo, de xeito que poidan ser proxectadas sucesivamente cunha periodicidade mensual, deixando libres os meses de xullo e agosto, a partir da Gala dos Premios Mestre Mateo, que terá lugar o 19 de marzo de 2022.
- Xestionar os dereitos de exhibición das obras.
- Responsabilizarse do tráfico das copias e materiais: envío e recollida.
- Elaborar a sinopse e ficha técnica de cada obra.
- Elaborar aplicacións gráficas para difusión de carteleira e a través das redes sociais.
- Realizar dúas xornadas de formación sobre comunicación e promoción de proxectos culturais para as persoas responsables da organización nas entidades galegas do exterior.
- Destinar a achega da Secretaría Xeral da Emigración á realización do proxecto deste convenio.
- Facer constar a imaxe corporativa da Xunta de Galicia en todos os materiais que se realicen vencellados ao obxecto do convenio

TERCEIRA.- Compromisos da Secretaría Xeral da Emigración

A Secretaría Xeral da Emigración obrígase a:

- Seleccionar 8 entidades galegas no exterior que estean en condicións de acoller o desenvolvemento do Ciclo Mestre Mateo.
- Facilitar á Academia Galega do Audiovisual o contacto coas 8 entidades seleccionadas.

- Coordinar a participación das entidades galegas no exterior no desenvolvemento do ciclo.
- Colaborar activamente na difusión do Ciclo Mestre Mateo.
- Supervisar as actuacións relativas ao desenvolvemento do convenio que son da súa competencia.
- Contribuír ao financiamento das actividades obxecto deste convenio nos termos sinalados na cláusula segunda.

CUARTA.- *Calendario do Ciclo Mestre Mateo*

As oito obras integrantes do Ciclo Mestre Mateo serán facilitadas a cada unha das entidades seleccionadas para ser proxectadas sucesivamente cunha periodicidade mensual, seguindo o seguinte calendario:

Marzo 2022, sábado 26.

Abril 2022, sábado 23.

Maio 2022, sábado 21.

Xuño 2022, sábado 25.

Xullo e agosto 2022. Sen programación.

Setembro 2022, sábado 17.

Outubro 2022, sábado 22.

Novembro 2022, sábado 19.

Decembro 2022, sábado 3.

Xunto coa obra, a Academia Galega do Audiovisual facilitará a súa ficha técnica e materiais editables para facer difusión. Así mesmo, nunha data que se pactará coas entidades dentro da primeira fase do proxecto, realizaranse dúas xornadas de formación sobre comunicación e promoción de proxectos culturais para as persoas responsables da organización.

QUINTA.- *Importe e condicións de pagamento*

O orzamento total do Ciclo Mestre Mateo, que se acompaña como anexo a este convenio, é de 32.540 euros. A Academia Galega do Audiovisual percibirá da Secretaría Xeral da Emigración unha compensación de vinte e nove mil euros (29.000€), que supón un 89,12% sobre o orzamento total, polos gastos en que incorra no desenvolvemento do convenio, con cargo á aplicación orzamentaria 04.30.312C.640.0 dos orzamentos xerais da Comunidade Autónoma de Galicia para o ano 2022.

A contía referida neste convenio farase efectiva en dous pagamentos de 14.500 euros; un ao rematar a primeira fase do proxecto no mes de xuño e outro ao

finalizalo no mes de decembro, previa entrega por parte da Academia Galega do Audiovisual da seguinte documentación

- Factura expedida pola Academia Galega do Audiovisual contra a Secretaría Xeral da Emigración e certificación do/da representante legal da Academia sobre os traballos do período ao que se refire e o seu importe.
- Certificados de que se atopa ao día das súas obrigas tributarias e fronte á Seguridade Social, e de que non ten pendentes de pagamento débedas coa Comunidade Autónoma.

A documentación xustificativa relativa á segunda fase dos traballos deberá entregarse en todo caso antes do 10 de decembro de 2022.

No caso de non xustificarse a contía total, o libramento de fondos reducirase na mesma proporción que represente a contía xustificada; se o importe que se xustifique excede do orzamento inicial, a contía que compensará a Secretaría Xeral da Emigración terá como límite máximo 29.000€. En todo caso, a Secretaría Xeral da Emigración queda facultada para pedir, en calquera momento, a información que considere necesaria para o seguimento da efectividade do contido deste convenio e para esixir cantos documentos estime necesarios para a debida xustificación do gasto.

Así mesmo, a entidade estará obrigada a facilitar toda a información que lle sexa requirida pola Intervención Xeral da Comunidade Autónoma de Galicia, o Tribunal de Contas e o Consello de Contas, no exercicio das súas funcións de fiscalización e control.

A achega económica límitase á compensación de gastos e en ningún caso supón beneficio económico para a Academia.

SEXTA.- *Relación laboral*

A subscrición deste convenio non implicará relación laboral ou de calquera outra natureza entre as persoas ou profesionais que desenvolvan as accións que constitúen o seu obxecto coa Secretaría Xeral da Emigración, de tal xeito que, por este concepto, non se lle poderá esixir á mencionada secretaría responsabilidade ningunha, nin directa nin subsidiaria.

SÉTIMA.- *Publicidade do convenio*

Este convenio será obxecto de publicación e inscrición, de conformidade co disposto no artigo 15 da Lei 1/2016, do 18 de xaneiro, de transparencia e bo goberno da Administración pública galega. As partes asinantes prestan o seu consentimento para incluír e facer públicos os datos relevantes referidos ao convenio asinado no rexistro público de convenios creado polo Decreto 126/2006, do 20 de xullo, polo que se regula o Rexistro de Convenios da Xunta de Galicia.

Así mesmo, as partes asinantes do convenio manifestan o seu consentimento para que os datos persoais que constan neste convenio, así como o resto das especificacións contidas nel, poidan ser publicados no Portal de transparencia e Goberno aberto.

OITAVA.- Comisión de seguimento.

Constitúese unha comisión mixta paritaria como mecanismo de actuación conxunta para o seguimento, coordinación e avaliación das actuacións estipuladas no convenio. Esta comisión, que se reunirá a petición de calquera das partes, estará formada por dúas persoas en representación da Secretaría Xeral da Emigración e dúas en representación da Academia Galega do Audiovisual e será presidida pola secretaria xeral. O dito órgano colexiado rexerese polo disposto na Lei 40/2015, do 1 de outubro, de réxime xurídico do sector público.

NOVENA.- Modificación, extinción e réxime de liquidación

1. As partes poderán modificar o convenio en calquera momento de mutuo acordo e a súa tramitación realizarase nos mesmos termos que o presente convenio.

Igualmente, de conformidade co establecido no artigo 31.4 da Lei 14/2013, do 26 de decembro, de racionalización do sector público autonómico, o convenio poderá ser obxecto de modificación cando teña como finalidade o logro dos obxectivos de estabilidade orzamentaria e sustentabilidade financeira.

2. O convenio poderá extinguirse polas causas xerais admitidas en dereito e, en particular, por calquera das seguintes:

- O mutuo acordo das partes asinantes.
- As circunstancias que imposibiliten a realización das actuacións previstas.
- O incumprimento dos compromisos e obrigas establecidas.

Así mesmo, será causa de resolución a denuncia expresa de calquera das partes, que poderá realizarse en calquera momento, previa comunicación por escrito á outra parte asinante con unha antelación mínima dun mes respecto da data na que se vaia dar por finalizado.

3. Se cando conorra algunha das causas de resolución do convenio existen actuacións en curso de execución, as partes, a proposta da comisión de seguimento poderán acordar a continuación e finalización das actuacións en curso que considere oportunas, establecendo un prazo improrrogable para a súa finalización, transcorrido o cal deberá realizarse a súa liquidación.


DÉCIMA.- Información básica sobre protección de datos de carácter persoal

As partes asinantes virán obrigadas en materia de protección de datos a cumprir co Regulamento (UE) 2016/679 do Parlamento Europeo e do Consello do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos) e demais disposicións vixentes sobre a materia.

Os datos de carácter persoal aos que se teña acceso en virtude deste convenio serán tratados por ambas as dúas partes asinantes coa finalidade de levar a cabo a tramitación administrativa que se derive da súa xestión.


O tratamento dos datos baséase no exercicio de poderes públicos conforme á normativa recollida nas cláusulas do convenio e as referencias recollidas na páxina <https://www.xunta.gal/información-xeral-proteccion-datos>. Con todo, determinados tratamentos poderán fundamentarse no consentimento das persoas interesadas.

As persoas interesadas poderán acceder, rectificar e suprimir os seus datos, así como exercitar outros dereitos ou retirar o seu consentimento, a través da sede electrónica da Xunta de Galicia ou de xeito presencial nos lugares e rexistros establecidos na normativa reguladora do procedemento administrativo común, segundo se explicita na información adicional recollida en <https://www.xunta.gal/proteccion-datos-persoais>.



Así mesmo, en aplicación deste convenio respectaranse cantas esixencias establece a Lei orgánica 3/2018, do 5 de decembro, de protección de datos e garantía dos dereitos dixitais, adoptando as medidas que resulten necesarias para cumprir as súas previsións e, en particular, para garantir a seguridade e integridade dos datos e a súa protección fronte alteracións, perdas, tratamentos ou accesos non autorizados.

DÉCIMO PRIMEIRA.- Relación por medios electrónicos



En cumprimento do disposto no artigo 14.2 da Lei 39/2015, do procedemento administrativo común das administracións públicas, a relación administrativa entre as partes asinantes realizarase por medios electrónicos. As notificacións realizaranse só por medios electrónicos a través do Sistema de Notificación Electrónica de Galicia Notific@, <https://notifica.xunta.gal>. Para poder acceder a unha notificación electrónica, a persoa interesada deberá contar cun certificado electrónico asociado ao NIF que figure como destinatario da notificación. Así mesmo, a persoa interesada pode autorizar a calquera outra persoa a acceder ao contido das súas notificacións.

DÉCIMO SEGUNDA. - Réxime xurídico

Este convenio ten carácter administrativo, réxese polas súas cláusulas e, no seu

defecto, aplicaráselle os principios da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, para resolver as lagoas e dúbidas que se puidesen presentar. Á súa vez, en canto lle sexa de aplicación, estarase ao disposto na Lei 40/2015, do 1 de outubro, de réxime xurídico do sector público, no Decreto legislativo 1/1999, do 7 de outubro, polo que se aproba o texto refundido da Lei de réxime financeiro e orzamentario de Galicia, e demais normas de procedente aplicación.

As posibles discrepancias que poidan xurdir na aplicación e/ou interpretación deste convenio resolveranse por diálogo directo entre as partes ou pola comisión paritaria de seguimento prevista na estipulación oitava. As controversias non resoltas serán sometidas á xurisdición contencioso-administrativa, de conformidade coa Lei 29/1998, do 13 de xullo, reguladora da xurisdición contencioso-administrativa.

DÉCIMO TERCEIRA.- Vixencia

Este convenio entrará en vigor o día da súa sinatura e estenderá a súa vixencia ata o 15 de decembro de 2022, agás que sexa denunciado por algunha das partes por incumprimento dos acordos que nel se recollen.



En proba de conformidade con canto antecede, asinan dous exemplares deste convenio, no lugar e data sinalados no encabezamento.

O secretario xeral da Emigración



Antonio Rodríguez Miranda

O presidente da Academia Galega do Audiovisual



Álvaro Pérez Becerra

ORZAMENTO CICLO MESTRE MATEO CENTROS GALEGOS NO EXTERIOR

ORZAMENTO	
XESTIÓN: Dereitos de Exhibición 8 películas	10.500,00 €
XESTIÓN: Transportes	1.100,00 €
XESTIÓN: Produción Ciclo	6.850,00 €
COMUNICACIÓN E PROMOCIÓN	5.600,00 €
FORMACIÓN	950,00 €
ENCONTRO DE SALAS	2.200,00 €
ASESORAMENTO XURIDICO	2.580,00 €
GASTOS XERAIS PRODUCIÓN	2.700,00 €
TOTAL	32.540,00 €

